

**Uunga siunnersuut: Avatangiisit innarlitsaaliorneqarnissaat pillugit Inatsisartut
inatsisaat nr. xx, xxxx-ip xx-ani 2011-meersoq**
(Nunamut Namminermut, Pinngortitamut Avatangiisinullu Naalakkersuisoq)

pillugu

Sanaartornermut Avatangiisinullu ataatsimiititaliap isumaliutissiisutaa.

Siunnersuutip aappassaaneerpeqarnerani saqqummiunneqartoq.

Ataatsimiititaliap suliarinninnerani ilaasortat uku kingullermik peqataapput:

Inatsisartunut ilaasortaq Naaja Nathanielsen, Inuit Ataqtigiit, Siulittaasoq
Inatsisartunut ilaasortaq Storm Ludvigsen, Inuit Ataqtigiit
Inatsisartunut ilaasortaq Niers Thomsen, Demokraterne
Inatsisartunut ilaasortaq Knud Fleischer, Kattusseqatigiit Partiiat
Inatsisartunut ilaasortaq Malik Berthelsen, Siumut
Inatsisartunut ilaasortaq Anders Olsen, Siumut
Inatsisartunut ilaasortaq Jens Immanuelson, Siumut

Ulloq 27. september 2011 UKA 2011-mi siullermeerneqarnerata kingorna Ataatsimiititaliap siunnersuut misissorpaa, matumuunakkullu Inatsisartunut naliligassanngorlugu aalajangiinissaannut tunngavissatut isumaliutersuutini saqqummiullugu.

Siunnersuutip imaa aamma siunertaa

Avatangiisit innarlitsaaliorneqarnissaannik inatsisissatut siunnersuummi avatangiisit pillugit peqqussutit tallimat ataatsimoortinneqarput, taamaalilluni pineqartoq pillugu inatsiseqarneq paasiuminarnerusunngortinneqassalluni. Aammattaaq inatsiseqarneq ullutsinnut naleqqussaanneruvoq avatangiisitigut tunngavissatut arlaqartut Kalaallit Nunaannut atuuttut inatsimmi allassimalermata. Ilaatigut pineqarput “BAT-imik tunngavik (“Best Available Technology” – Teknikki Pissarsiarineqarsinnaasoq Pitsaanerpaaq”) aamma “Mingutsitsisup akiliuteqartussaaitaneranik tunngavik” kiisalu “pisimasup qanoq ingerlasimaneranik tunngaveqarneq”. Inatsisissatut siunnersuutip piujuartitsinermik tunngaveqarluni avatangiisit, pinngortitap inuillu peqqinnerisa illersorneqarnissaat siunertaraa, ilaatigut silaannaap, erngup, sermip, qaqqat aamma nunap mingutsinneqartarnerisa pinaveersaartinneqarnerisigut mingutsitsinerullu akiorneqartarnerisigut. Peqatigitillugu siunnersuutikkut isumalluutinik

atuinerup maangaannartitsisarnerullu killilersimaarneqarnissaa, aamma atoqqiisarnerup siursaavigineqarnissaa kissaatigineqarpoq.

Inatsisissatut siunnersuut imarisamigut arlalinnik nassataqarpoq ilaatigut makkuninnga:

1. Nunami sumi inatsisip atuunneranik erseqqissaaneq (§1)
2. Inatsimmik malinninnissamut pisortat immikkut pisussaaffeqarnerannik ersersitsineq (§7)
3. Immikkoortuni aalajangersimasuni maleruagassiorsinnaanermut Naalakkersuisunut assigiinngitsutigut piginnaatitsinerit (§ 10, imm. 1, nr. 7, 11, 14, 15, 19, 20, 27 aamma 28)
4. Immap erngullu illersorneqarnerat pillugu malittarisassat (§§ 15, imm. 2, 16 aamma 17.)
5. Imeqarfiit killeqarfiisa iluanni ingerlataqarnissamut inerteqquteqarnermiit Naalakkersuisut immikkut akuersissuteqarsinnaanerannut suut naammassineqarsimanissaannut aalajangersaaneq. (§29)
6. Sanaartugassanik anginerusunik sanaartornissamut akuersissuteqarnermut atatillugu avatangiisinut sunniutinik nalilersuineq pillugu maleruagassat (§§ 41 aamma 42)
7. Pigisanut il.il. isersinnaaneq (§ 47)
8. Tamanut saqqummiussisarneq aamma innuttaasut peqataatinneqarnissaat pillugu maleruagassiornermut aalajangersaaneq (§48).
9. Akiliisitsissutissap annertusissusilerneqarneranut inuussutissarsiummik ingerlatsisimaneq sukannerulerulersitsuusoq pillugu ersersitsineq (§68).

Siunnersuummi imarisatigut allannguutit itisilerneqarnerannut aamma siunnersuutip nassuiaatitai nalinginnaasut innersuussutigineqarput.

Inatsisartuni siunnersuutip siullermeerneqarnera

Siullermeerinninnermi isummersorneq partiinillu oqaaseqaataat tunngavigalugit Inatsisartuni siunnersuut sammineqarmat ataatsimut isigalugu siamasissumik tapersersorneqartoq malugineqarsinnaavoq. Partiit tamarmik isumaqatigiipput avatangiisinut inatsiseqarnermi maleruagassat atuuttut katiterlugit allattornissaat iluaqutaasoq, taamaalilluni inatsit ersarinnerulerlunilu paasiuminarnerulissagami. Taamaattorli partiit oqaaseqaatiminni siunnersuutigaat, inatsisissatut siunnersuutip Ataatsimiititaliami suliarineqarnerani pissutsit arlallit ilanngunneqassasut. Inuit Ataqtigiit siunnersuutigaat aatsitassanut inatsiseqarnermi avatangiisinut tunngasortai uunga inatsisissatut siunnersuummut maanngangaaq ilanngullugit allattorneqassasut. Siumumit annertuumik ernummatigineqarpoq, siunnersuutikkut imeqarfiit killeqarfiisa iluanni periarfissaqarsinnaaneq immikkut akuersissuteqartarnissamut siunnersuutikkut annertunerusunik ammaanmaqarmat. Siumumittaaq kissaatigineqarpoq § 47

tulluartaunersoq taamaalillunilu avatangiisit innarlitsaaliorneqarnissaanut inatsimmi attatiarneqassanersoq misissorneqassasoq. Demokraatit siunnersuutigaat § 36, imm. 1-imi pineqartut iginneqartussat kommuninit akitsorterussinikkut tuniarneqarsinnaanerannut periarfissiisumik aalajangersakkamik ilanngussisoqassasoq. Kiisalu Kattusseqatigiit Partiiat kissaateqarpoq kuuffiit pillugit aningaasaateqarfiliornissaq pillugu immikkut inatsisiliornissap qaqugu pinissaa naatsorsuutigineqarsinnaanersoq.

Ataatsimiititaliap siunnersuummik suliarinninnera

Tusarniaanermi akissutit

Ataatsimiititaliap maluginiarpaa siunnersuut marloriarluni maj 2010-mi aamma marts 2011-mi tusarniaassutigineqarsimasoq. Taamaattumik isumaqarnarpoq tusarniarneqartut siunnersuummi pingaarnertut imarisaasut pillugit naammaginartumik naliliinissamut oqaaseqarnissamullu periarfissaqarluarsimasut.

Paasissutissiinermik ataatsimeeqatigiinnerit il.il.

Ataatsimiititaliap suliarinninnerup nalaani Nunamut namminermut, Pinngortitamut Avatangiisinullu Naalakkersuisumik paasissutissiinermik Ataatsimiititaliap ataatsimeeqateqarsimavoq, Ataatsimiititaliarlu inatsisissatut siunnersuutip imarisaasa paasineqarnissaannut nassuiaanneqarpoq. Tamatumunnga atatillugu Naalakkersuisunut ilaasortap aamma Naalakkersuisoqarfiup imarisaasut paasineqarnissaannut nassuiaateqarnerannut Ataatsimiititaliap iluarisimaarinnippoq.

Ataatsimiititaliap suliarininnermut atugassanik ilisimatitsissutinik marlunnik Ataatsimitaliap Nunamut namminermut, Pinngortitamut Avatangiisinullu Naalakkersuisumit tunineqarpoq, tassaasut siullermeerinninnermi partiit oqaaseqartartuisa saqqummiussaannut oqaaseqaatit aamma siunnersuutip aningaasaqarnikkut allaffissornikkullu kingunerisassaasa allaaserineqarnerat. Ilisimatitsissutit isumaliutissiissummut uunga ilanngunneqarput, tassaasut **ilanngussaq 1** aamma **ilanngussaq 2**. Ilisimatitsissutit siunnersuummut nassuiaassissutinik paasinneriaatsinullu tunngasunik imaqarpoq. Ataatsimiititaliap ataatsimut isigalugu ilisimatitsissutit tusaatissatut tiguai.

Piginnaatitsilluni inatsisip tunngavissiorneqarnera aamma tusarniaaffiit akuutinneqarnerat

Inatsisissatut siunnersuut misissoreerlugu Ataatsimiititaliap maluginiarpaa avatangiisit pillugit maleruagassanik Naalakkersuisut aalajangersaanissaannut inatsisissatut siunnersuut arlalitsigut piginnaatitsissutinik imaqartoq. Ataatsimiititaliap maluginiarpaa piginnaatitsinnermut aalajangersakkat ilai inatsisini atuuttuniittunut assingungajalluinnartut. Taamaattorli inatsisissatut siunnersuut pissutsinik avatangiisinik innarlitsaaliuinnermut

pinngitsoorani pingaaruteqalersinnaasunik aalajangersakkanik piginaatitsissutinik nutaanik aamma imaqarpoq. Tassaapput imeq minguttoq pillugu, eqqagassalerisarneq pillugu aamma Avatangiisinut sunniutinik naliliisarneq pillugu maleruagassanik aalajangiisinaanermut piginnaatitsinerit.

Inuit Ataqatigiit oqaaseqartartuata saqqummiussaanut oqaaseqaammi (**ilanngusaaq 1**) immikkoortoq 10-mi oqaatigineqarpoq *“Nalunaarutit uku siulliunneqartussaapput: Eqqakkat pillugit nalunaarut, imikoorut pillugu nalunaarut aamma ASN pillugu nalunaarut. Nalunaarutit taakku piareersarneqarneri naatsorsuutigineqarpoq 2011-p aamma 2012-ip ingerlanerini ingerlanneqassasut.”* Nalunaarutit siuliani taaneqartut pillugit Naalackersuisut suliaqarnissamut ersarissumik pilersaarusiorsimmata tulleriiaralutillu Ataatsimiititaliap pitsaasutut isigaa. Tamatumunnga atatillugu Ataatsimiititaliap paasivaa avatangiisinut sunniutaasut pillugit naliliinnernut nalunaarusiassamut nutaamut missingiut ulloq 7. oktober 2011 tusarniutigalugu nassiunneqarsimasoq. Pingaaruteqarpoq piginnaatitsilluni inatsisip maleruagassanik tigussaasunik ataqatigiissunillu tunngavilersorsimanissaa, taamaalillunilu naalackersuinikkut anguniakkat timitalersorneqarnerat taamaaliornikkullu piviusunnigortinneqarnerat isumannaarneqassalluni. Inatsisissatut siunnersuutip imarisaani piginnaatitsinerit amerlasuut atugaanerannut atatillugu siunissami pilersaarutit pillugit kiisalu suliap ingerlaqqinnerani ineriartorneq pillugu ataavartumik ilisimatinneqartarnissaaq Ataatsimiititaliap naatsorsuutigaa.

Aammattaq piginnaatitsilluni inatsisip tunngavilersorneqarneranut suliaqarnermi tusarniaaffigisat susassaqartut sapinngisaaq malillugu peqataatinneqarnissaat Ataatsimiititaliamut pingaaruteqarluinnarpoq. Peqataatitsineq suliniarnermi sapinngisaaq malillugu pilertortumik pisassaaq, Ataatsimiititaliarlu isumaqarpoq tusarniaaffigisat susassaqartut ataatsimiinnerni assigisaanniluunniit ataavartumik oqaloqatigineqartarnissaat pisariaqartoq. Tamatumunnga atatillugu tusarniaaffigisat susassaqartut tusarniaanikkut, ataatsimiinnikkut timitalersuilluni ataatsimiittarnikkut peqataatinniarneqarnerat Naalackersuisut **ilanngusaaq 1-imi** oqaatigimmassuk Ataatsimiititaliap pitsaasutut isigaa.

Avatangiisit pillugit oqartussat aamma nakkutilliineq

Inatsisissatut siunnersuummi §§ 8 aamma 9 maleruagassanik atuuttunik ingerlatitseqqiinerupput, aalajangersarneqarporlu Naalackersuisut avatangiisit pillugit qitiusumik oqartusaasusut, kommunalbestyrelsilu najukkami avatangiisit pillugit oqartussaasuullutik. Maleruagassat inatsisissatut siunnersuummi kap. 12-mut ataqatigiissinneqassapput, tassani nakkutilliillutik oqartussaasut ingerlatsinerat allaaserineqarpoq. § 49-mi kommunalbestyrelsip aamma Naalackersuisut pissutsit suut nakkutigissaneraat pillugu ersarissumik agguataarinermik aalajangersaasoqarpoq. § 49, imm. 4 periarfissiivoq isumaqatigiinniareernikkut ingerlatat immikkut nalunaarsukkat

nakkutigineqarnerat kommunalbestyrelsinut tunniunneqarsinnaasoq, kiisalu isumaqatigiinniareernermi nakkutilliinermi suliaasat kommunalbestyrelsimit isumagineqartut Naalakkersuisunut tunniunneqarsinnaanerit pillugu Naalakkersuisut maleruagassanik aalajangersaasinnaasut. Ataatsimiititaliaq isumaqarpoq oqartussaasut akornanni nakkutilliinerup agguataarneranut atatillugu inatsisip eqaatsumik periarfissaqartitsinera nassuiaatigilluarneqarsimasoq. Taamaalilluni maanna nakkutilliinermut suliaasat agguataarnerisa naleqquttuunerat pillugu ataavartumik nalilersuinissamut periarfissamik pilersitsisoqarpoq. Tamatumunnga atatillugu Ataatsimiititaliaq isumaqarpoq naleqquttuusoq erseqqissaatigissallugu immikkoortunik inatsisitigut tunngavigiligaanngitsunik nakkutilliinerup kingunerisaanik inatsit naapertorlugu kommunalbestyrelsip nakkutilliinissamut pisussaaffiup tamatuma isumaginissaanut Naalakkersuisut sulia isumannaarinninnissamut pisussaaffeqarmata. Taamaalillutik avatangiisit innarlitsaalineqarnissaanut inatsisip eqqortinneqarneranut Naalakkersuisut toqqaannanngitsumik akisuusaaffeqarput.

Ataatsimiititaliap suliaqarnermini paasivaa inatsisissatut siunnersuummi kalaallisuuani § 49, imm. 4-mi oqaaseqatigiit uku ilanngunneqarsimanngitsut: *”Efter forhandling med en kommunalbestyrelse kan Naalakkersuisut henlægge tilsynet med nærmere specificerede virksomheder til denne kommunalbestyrelse.”* Ataatsimiititaliaq kaammattuuteqarpoq Naalakkersuisut pingajussaaneerisoqartinnagu allannguutissatut siunnersuummik saqqummiussissasut, taamaalilluni qallunaatut kalaallisullu allassimasut assigiissinneqassallutik.

Paragraffinut ataasiakkaanut Ataatsimiititaliap oqaaseqaatai

§ 4

Aalajangersakkami takuneqarsinnaavoq, inatsimmi ilaatinneqanngitsut *“Aatsitassat pillugit ingerlatallu tamatumunnga pingaarutillit pillugit Inatsisartut inatsisaanut suliat ilaatinneqartut...”*

Ataatsimiititaliami siunnersuutip suliarineqarnerani aatsitassanut inatsimmi avatangiisit pillugit piumasaqaatit inatsisissatut siunnersuummut uunga maanna ilanngunneqariissappata isumatasaarnerussannginneroq isummersortoqarpoq. Taamaalillutik inatsisini marluusuni tunngaviusut assigiit ingerlanneqarsinnaapput, aamma nassuiaanermut nalornissutit pinngitsoortinneqassallutik. Nunamut namminermut, Pinngortitamut Avatangiisinullu Naalakkersuisup Ataatsimiititaliamit paasissutissiinermik ataatsimeeqatigineqarneranut atatillugu eqqartorneqarportaaq, aatsitassarsiornermut ingerlatsinerit avatangiisinut tunngassuteqartut Nunamut namminermut, Pinngortitamut Avatangiisinullu Naalakkersuisoqarfimmumut nuunneqareerpata avatangiisit innarlitsaaliornissaanut inatsisip akuerineqarnissaa utaqqissunneqarsinnaanersoq. Naalakkersuisup tamanna oqaaseqarfigaa

ilanngussaq 1-imi immikkoortoq 4-mi Inuit Ataqtigiit oqaaseqartartuata saqqummiusnaanuk oqaaseqaateqarnermut atatillugu, taallugulu nuussinissaq siusinnerpaamik 2013-imi pisinnaasoq naatsorsuutigineqqrtoq *"Maannakkut aatsitassanut inatsit aamma avatangiisit pillugit inatsit annertuutigit tunngaviit taakku assingi malillugit ingerlanneqareerpoq. Pisut ilaanni aatsitassanut inatsimmi avatangiisit pillugit inatsimmit qaffasinnerusunik piunasaqaateqarpoq, tamannalu aatsitassarsiornermut atatillugu ingerlatat qanoq ittuunerinut avatangiisinullu kingunerisinnaasaannut naleqqiullugu naleqquttutut isigineqarluni. ... Aatsitassanut inatsimmi avatangiisinut piunasaqaatit ataatsimoortilerlugit allanneqarnissaasa tungaannut avatangiisit pillugit inatsisip akuerineqarnissaa utaqqissunneqassappat inatsimmi immikkoortut arlallit iluini iluarsiiniarnerit pingaaruteqartut aamma kinguartinneqartariaqassapput. Akerlianilli inatsit akuerineqarpat taava inatsiseqalissaaq maannakkut inuiaqtigiit ineriartornerannut pitsaanerusumik naleqqussarsimasumik, aamma tusarniaaffigineqartunit assigiinngitsuniit pisariaqartinneqartut siunnersuutigineqartullu."*

Ataatsimiititaliap oqaasertaliussat tusaatissat tiguai. Ataatsimiititaliarli isumaqarpoq avatangiisit pillugit piunasaqaatit assigiit suliffeqarfinnut Avatangiisit innarlitsaaliorneqarnissaat pillugu inatsimmi piunasarineqartut, aamma suliffeqarfinnut Aatsitassanut inatsimmi pineqartunut piunasarineqarnissaat Naalakkersuisunit anguniarneqartariaqartoq. Ataatsimiititaliaq isumaqarpoq, suliffeqarfinni Avatangiisit innarlitsaaliorneqarnissaat pillugu inatsimmi pineqartuni suliaqarneq, aamma suliffeqarfinni Aatsitassanut inatsimmi avatangiisit pillugit piunasaqaatinik atuisuni suliaqarneq avatangiisinut assingusumik annertuumik sunniuteqartitseratarsinnaasoq.

Aatsitassanut inatsimmi avatangiisit pillugit piunasaqaatit tunniunneqarnissaannut suliaq Ataatsimiititaliap malinnaaffiginiarppaa, tamannalu pillugu ataavartumik ilisimatinneqartarnissaaq naatsorsuutigalugu.

§ 5 Teknologii pitsaanerppaaq pissarsiarineqarsinnaasoq pillugu tunngavissaq (BAT-mik tunngavissaq)

Teknologii pitsaanerppaaq pissarsiarineqarsinnaasoq pillugu malitsitsinissamut Inuit Ataqtigiit oqaaseqartartuannit saqqummiussamut Naalakkersuisut oqaaseqaataani imm. 3-mi siullermik oqaatigineqarpoq, Inuit Ataqtigiit siunnersuutaanni avatangiisit aningaasarsiornermut soqutigisanit pingaarnerutinneqarnissaannut mianerinninnissamut ersarissaanissamut tunngasoq, oqaatigineqarporlu *"Siunnersuut soqutiginarpoq, tamanna kissaatigineqarpat inatsimmut nassuiaatinut ilanngunneqarsinnaavoq."* Aappaatigulli allasimavoq *"Tunngaviup BAT-ip atorineqarneranili pisuni aalajangersimasuni suli tunngaviup BAT-ip atorineqarnerani iluaqutaasut tamarmik tunngaviup atorineqarneranut atasunut aningaasaqarnikkut kinguniinut oqimaaqatigiissinneqassapput."* Ataatsimiititaliaq isumaqarpoq saqqummiussat taakku imminnut assortuuttut, isumaqarlunilu

aalajangersinnaanagu, Naalackersuisut piviusorsioortumik isumaqarnersut BAT-mik tunngaviusup atorneqarnerani avatangiisinut mianerinninneq tamatigut pingaarnerpaatinneqartariaqartoq. Taamaattumik siunnersuutip aappassaaneerseqarnissaanut tamatuma annertunerusumik nassuiaatigineqarnissaa Ataatsimiititaliap Naalackersuisunut qinnutigissavaa. Inuit Ataqtigiit oqaaseqartartuata saqqummiusnaanut oqaaseqaatini imm. 3-mi takuneqarsinnaavoq, tunngaviup isumaginissaanut allaffissornikkut misilittagaqartoqareersoq. Taamaattumik Ataatsimiititaliap kissaatigaa oqimaaqtigiissitsinermi aningaasaqarnikkut sunniuttaasunut sanilliullugu sutigut BAT-mut tunngaviusut pingaartinneqartarsimannginersut pillugit assersuutinik, nassuiaammi siuliani taasami aamma saqqummiussisoqassasoq.

§ 29 Imeqarfiit killeqarfiisa iluanni ingerlataqarnissamut inerteqquteqarnermiit immikkut akuersissuteqarneq

Imerk imertagassamik minguitsumik periarfissaqarnissaq inuiaqatigiinnut pingaaruteqarluinnarpoq. Taamaattumik erngup imertagassap illersorneqarnissaa, imeqarfiillu killeqarfiisa iluanni ingerlataqarnissamut inerteqquteqarnermit immikkut akuersissuteqartarnermut aqutsinermi killilersuinissap attanneqarnissaa Sanaartornermut Avatangiisinullu ataatsimiititaliamut pingaaruteqarpoq. Pineqartoq pillugu aalajangersakkami maanna atuuttumi immikkut akuersissuteqartoqarsinnaavoq “tamatumunnga pissutsit immikkut ittut tamanna ajornartinnigpassuk”. Ataatsimiititaliaq isumaqarpoq aalajangersagaq *“inuiaqatigiinni pissutsit immikkut illuinnartut imaluunniit inuit ajoqusersinnaanerisa pinaveersaarneqarnissaat pissutaappata”* allanngortikkaanni immikkut akuersissuteqartarnermut periarfissaq malunnaatilimmik annertusissasoq. Tusarniarneqartut arlallit ilaatigut Kalaallit Nunaanni Sulisitsisut, Nukissiorfiit aamma Peqqinnissaqarfimmi Nakkutilliisoqarfik immikkut akuersissuteqartarnermik periarfissap annertusinissaa aarleqqutigaa, taamaalioqqusinatillu. Naalackersuisut nassuiaatini nalinginnaasunit Peqqinnissaqarfimmi Nakkutilliisoqarfimmik tusarniaanermut akissumminni taavaat aningaasanut inatsisikkut tullerriaarinermit atatillugu tamanna nalilersorneqartoq, imeqarfiit pitsaanerulersinnissaannut pisariaqartitsisoqarnerseq, kiisalu nunatsinni sumiiffinni arlalinni imeqarfiit pitsaanerulersinnissaasa pisariaqarneranut Nunanut namminermit, Pinngortitamut Avatangiisinullu Naalackersuisoqarfik Ineqarnermut, Attaveqarnermut Angallanermullu Naalackersuisoqarfimmik oqaloqateqalernikuusooq, ataatsimut isigalugu imeqarfiit killeqarfiisa iluanni amerlanerusunik ingerlataqarnissaa kissaatigineqarmat. Tamatumunnga Ataatsimiititaliaq erseqqissaateqaqqissaaq erngup imertagassap illersorneqarnissaa pingaaruteqarluinnartuusooq, kiisalu imeqarfiit killeqarfiisa iluanni annertunerusumik ingerlataqarnissaaq pisariaqanngitsumik ammaanneqassanngimmat.

Ataatsimiititaliaq isumaqarpoq pissutsit immikkut illuinnartut pineqarmata, tamanna aalajangersakkami annertunerusumik takutinneqartariaqartoq. Siuliani taaneqartut

tunngavigalugit Ataatsimiititaliaq **kaammattuuteqassaaq**, Naalakkersuisut pingajussaaneerisoqartinnagu allannguutissatut siunnersuummik saqqummiussissasut ima oqaasertalimmik “Inuiaqatigiinni pissutsit pingaarutillit pisariaqartippassuk Naalakkersuisut qaqutigunnaq § 28, imm. 2-mi inerteqquteqarnermut immikkut akuersissuteqarsinnaapput.”

§ 36 eqqakkanik igitsisarneq

Aalajangersakkami aalajangerneqarpoq kommunalbestyrelsip eqqakkanik igitsisarneq isumagissarigaa. Ataatsimiititaliaq isumaqarpoq kommunit tamatumunnga atatillugu biilit, umiatsiat qamuteralaat assigisaasalu akitsorterussinermit tuniniarnissaannut periarfissinneqarpata tulluurtuussasoq. Naalakkersuisut Demokraatit oqaasertartuata saqqummiussaanut oqaaseqaatiminni immikkoortoq 4-mi taavaat, taamatut aalajangersaaneq kissaatigineqarpat inatsimmi ilanngunneqarsinnaasoq. Tamanna tunngavigalugu Ataatsimiititaliaq kaammattuuteqassaaq, Naalakkersuisut pingajussaaneerisoqartinnagu allannguutissatut siunnersuummik saqqummiussissasut, taamaalilluni periarfissaq tamanna Inatsimmi allanneqarluni. Ataatsimiititaliattaq **kaammattuutigissavaa**, Naalakkersuisut allannguutissatut siunnersuummik suliaqarnerminni siunnersuutip nassaat pillugit maleruagassanut naapertuunnissaa isumannaassagaat. Tamatumunnga atatillugu akitsorterussinermit isertitat assersuutigalugu pisattat anginerit assartorneqarnerannut aamma toqqortarineqarnerannut atorneqarsinnaasut allannguutissatut siunnersuummi nassuiaatini allassimassanersoq isumaliutigineqarsinnaavoq. _

§ 40, imm. 1 nr. 7 atortussianik, nioqqutissianik aamma atortunik igitsisarnissamut inerteqqutit

Demokraatit oqaasertartuata saqqummiussaanut Nunamut namminermit, Pinngortitamut Avatangiisinullu Naalakkersuisup immikkoortoq 1-mi oqaaseqaataa tunngavigalugu Ataatsimiititaliap paasisinnaavaa, asimi aamma illoqarfinni nunaqarfinnilu atortussianik, nioqqutissianik atortunillu siunissami igitaqarnissamut aalajangersagaq taamaallaat atuuttoq, kingumoortumik atortussangortitsilluni inatsisiliortoqarsinnaangimmat. Aalajangersakkami ilaangilat soorlu Nordafarimi aamma siusinnerusukkut sakkutooqarfinni sanaartukkat ikkussukkallu qangali qimataasimasut. Ataatsimiititaliap tamanna tusaatissatut tiguaa. Ataatsimiititaliap ajunngitsutut isumaqarfigaa, Naalakkersuisut pissutsit tamakku isiginiarmatigit taamanikkullu illersornissamut ministeriisimasoq oqaloqatigineqarsimammat. Qangali qimatat oqaatigineqartut salinneqarnissaat pillugu Naalakkersuisut illersornissamik ministerimik nutaamik oqaloqatiginnereerpata Ataatsimiititaliap ilisimatinneqarnissani naatsorsuutigaa.

§ 47 pigisanut isersinnaaneq

Siunnersuutip Ataatsimiititaliami suliarineqarnerani aalajangersagaq taanna tulluurtuunersoq aamma inatsimmi attatiinneqassanersoq Ataatsimiititaliap isummensorfigaa. Avatangiisit

pillugit peqqussummut atuuttumut sanilliullugu maleruagassaq nutaaq pineqarpoq. Ataatsimiititalialli maluginialernikuuaa pinngortitamik illersuineq pillugu inatsimmi assingusumik aalajangersagaqartoq. Siullermik Ataatsimiititaliaq isumaqarpoq, aalajangersagaq annertoqisumik akuliunnerusq, oqartussaasummi imaluunniit inuit tamatumunnga piginnaatinneqartut eqqartuussisunit aalajangiinertaqanngitsumik pigisanut isersinnaatitaammata. Aappaatigut aalajangersakkamut nassuiaatini allassimavoq nakkutilliinermi nalinginnaasumi atorneqartassanngitsoq, taamaallaalli pinavissunik pisoqartillugu. Taamaalilluni uuliamik pequmaasivik assigisaaluunnit putusoorpat, atuisinnaanermullu pisinnaatitaasoq mingutsitsinissap pinngitsoortinnissaanut iliuuseqanngippat peqanngippalluunniit ingerlaannarlu iliuuseqarnissap pisariaqarnera eqqarsaataasinnaavoq. Taama pisoqartillugu eqqartuussisunit aalajangiinermik pissarsinissaq piffissaqarfigineqarnaviannigilaq. Taamaalisoqartillugu oqartussaasut immaqqa ajunaalernermi pisinnaatitaanermut pissutsit innersuussutigereerlugit eqqartuussisunit aalajangiineq pissarsiareqqaanngikkaluarlugu iliuuseqarsinnaapput. Ataatsimiititalialli tulluarnepaasutut isumaqarfigaa innuttaasup avatangiisit innarlitsaaliorneqarnissaannut inatsimmi toqqaannartumik atuarsinnaassagaa, pinavussuni assersuutigalugu mingutsitsineq pinaveersaartinniarlugu ingerlaannaq iliuuseqarnissap pisariaqarnerani eqqartuussisunit aalajangiinertaqanngitsumik pigisanut oqartussaasut isersinnaasut, innuttaasoq pineqartumi pisinnaatitaaffimminik ilisimasaqarnissamut ajunaalernermi pisinnaatitaanerit pillugit misissuiteqqaanngikkaluarlugu. Tamanna tunngavigalugu aalajangersagaq siunnersuummiiginnassasoq Ataatsimiititaliap tulluartsutut isigaa.

§ 48 Tamanut saqqummiussisarneq

Ataatsimiititaliap ajunngitsutut isumaqarfigaa tamanut saqqummiussisarneq pillugu aamma innuttaasut peqataatinneqarnissaat pillugu Naalakkersuisut maleruagassiorsinnaanerannut piginnaatitsisummik inatsisissatut siunnersuut imaqarmat. Iluuqutaasumik siunnersuutigineqarsinnaavoq, aatsitassanut inatsimmi avatangiisit pillugit piumasaqaatit tunniunneqarnerannut atatillugu pineqartoq pillugu aamma tamanut saqqummiussisarneq pillugu aamma innuttaasut peqataatinneqarnissaat pillugu inatsimmi maleruagassaqaassaq. Tamatumunnga atatillugu Ataatsimiititaliap saqqummiutissavaa avatangiisinut tunngasut saniatigut pissutsini allani tamanut saqqummiussisarneq pillugu aamma innuttaasut peqataatinneqarnissaat pillugu maleruagassaliortoqarnissaa tulluartsutannnginnersoq Naalakkersuisut ataatsimut isigalugu isumaliuteqartariaqartut.

Allannguutissatut siunnersuut

Appassaaneerinninnermut Naalakkersuisut §§ 28-mut aamma 31-imut allannguutissatut siunnersuuteqarput. Allannguutissatut siunnersuut ilanngussaq 3-tut ilanngunneqarpoq.

Ataatsimiititaliap suliarinninnermini allannguutissatut siunnersuut taamatut iluseqartillugu akuerineqassanersoq Ataatsimiititaliap isummersorfigaa. Ataatsimiititaliap isummersuutaa § 28, imm. 3-mi aalajangersakkamut nutaamut tunngassuteqarpoq. Aalajangersakkap nassuiaatitaani takuneqarsinnaavoq, tamanna tunngavigineqartoq tassaasoq: *“Qaqortumi imeqarfiup ingerlaqqittumik imermik suliarinnittumik imermik suliarinninerup annertusinissaanut akuersissummik Nukissiorfiit qinnuteqarnerisa kingorna aalajangersagaq pisariaqartinneqalerpoq, taamaalilluni imeqarfik imissatut ajornerusumik pitsaassusilimmik imissamik saliiinnaangorlugu, assersuutigalugu benzinamit/uuliakoormiit imaluunniit inuit suliaqarnerisa annertusinerini mingutsitsisoqarnerani.”* Siullermik § 29 malillugu immikkut akuersissuteqarnermi periarfissamut immikkoortumi allassimasutut Ataatsimiititaliaq isumaqarpoq imeq imertagassaq illersorneqassasoq, kiisalu imeqarfiit killeqarfiinut periarfissaqarneq suli killilersimaarneqartariaqartoq. Taamaalilluni Ataatsimiititaliap isumakuluutigisinnaavaa § 28, imm. 2-mi sulianut taaneqartunut annertunerusumik periarfissaqarneq killersuinerit qasukkarnerunerinik kinguneqassasoq.

Aappaatigut Ataatsimiititaliaq isumaqarpoq maannakkut pisinnaatitsinermut pissutsit illoqarfiup ilaa killeqarfiup iluaniitillugu illoqarfinnut tulluanneqisut, pigisanik aserfallatsaaliinerit suugaluartulluunniit immikkut akuersissuteqarnermik pisariaqartitsisarmata. Ataatsimiititaliaq isumaqarpoq imeqarfiit imermik pilersuinermut naleqquttunik atortulersorneqarsimappata erngup pitsaassusaanik Naalackersuisut piumasaqaataannik naammassinnissinnaasunik, taakku killeqarfiit iluanut periarfissaqarnerup ammaaneparnissaanut tunngavissaalluarsinnaasut.

Siuliani taasat ataatsimut isigalugu nalilernerisigut Ataatsimiititaliap allannguutissatut siunnersuut taama iluseqartillugu akuerisassanngorlugu inassutigaa. Maleruagassat nalunaarusiornikkut suliarineqassapput, Ataatsimiititaliallu paasivaa allannguutissatut siunnersuutip kingunerissagaa, Naalackersuisut pineqartumut aalajangiinikkut akuersissummik tunisinissamut § 28, imm. 2 malillugu imeqarfiup killeqarfiata iluani suliat suut ingerlanneqarsinnaanerat pillugu aalajangiissasut. Ataatsimiititaliap maluginiarpa nassuiaatini allassimasoq *“Qaqortumi qangalili kissaataasimavoq imermik suliarinnittarnerup pitsaanerulersinnissaa, taamaalilluni imeqarfik imissamik ajornerusumik pitsaassusilimmik saliiinnaangorluni taamaalillunilu nunap assersorneqarsimasup iluani killilersuinerit amerlanerit sakkukillineqarsinnaallutik imaluunniit atorunnaarsivinneqarlutik.”* Tamatumunnga Ataatsimiititaliaq oqaaseqaateqassaaq imermik suliarinninnerup pitsaanerulersereernerata kingorna killilersuinerit tamarmik atorunnaarsinnerannik aalajangersagaq kinguneqartariaqanngimmat, inatsisissatuummi siunnersuummi imm. 2-mi aallaaviususaaq suli tassaammat suliat taaneqartut imeqarfiup eqqaani killeqarfiup iluani ingerlateqqusaanngitsut.

Aningaasaqarnikkut allaffissornikkullu kingunerisassai

Taaneqareersutut siunnersuutip aningaasaqarnikkut allaffissornikkullu kingunerisassai pillugit Ataatsimiititaliaq Nunamut namminermut, Pinngortitamut Avatangiisinullu Naalakkersuisumit ilimatitsissummik tigusaqarnikuuvoq (**ilanngussaq 2**). Ataatsimiititaliap paasivaa ilisimatitsissut pisortanut (kommuninut aamma Namminersorlutik Oqartussanut), inuussutissarsiortunut innuttaasunullu aningaasaqarnikkut allaffissornikkullu sunniutissat pillugit inatsisissatut siunnersuummi aalajangersakkanut tamanut atatillugu ilisimatitsissummi sukumiilluinnartumik eqqartuisoqartoq allaaserinnittoqartorlu. Nassuiaatini aningaasaqarnikkut allaffissornikkullu kingunerisassat pillugit allaaserinninnermut ilanngullugu Ataatsimiititaliap paasisinnaavaa inatsisissatut siunnersuut Namminersorlutik Oqartussanut kommuninullu ataatsimut isigalugu killilimmik sunniuteqassasoq naatsorsuutigineqartoq. Siunnersuut inuussutissarsiortunut aningaasaqarnikkut sunniuteqassasoq naatsorsuutigineqarpoq. Aalajangersimaqqissaartumik aningaasat amerlassusaannut pineqartoq aalajangersimasoq suliffillu aalajangersimasoq apeqqaassapput. Siunnersuutip piginnaatitsissutitut aalajangersagartaanni aningaasaqarnikkut allaffissornikkullu sunniutissat aatsaat nalunaarutit aalajangersimasut suliarineqarnerannut atatillugu sukumiisumik sammineqarsinnaapput.

Ataatsimiititaliap inassutai

Ataatsimiititaliap isumaqatigiittup Naalakkersuisut allannguutissatut siunnersuutaat akuerineqassasoq **inassutigaa**t.

Ataatsimiititaliap isumaqatigiittup Naalakkersuisut inatsisissatutut siunnersuutaat tamatuma kingorna taamatut isikkoqartillugu akuerineqassasoq **inassutigaa**t.

Ataatsimiititaliap isumaqatigiittup siunnersuutip aappassaaneerreqarnerata pingajussaaneerreqarneratalu akornanni Sanaartornermut Avatangiisinullu ataatsimiititaliamit suliarineqarnissaa **inassutigaa**t.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.

Naaja Nathanielsen,
Siulittaasoq

Malik Berthelsen

Storm Ludvigsen

Anders Olsen

Knud Fleischer

Jens Immanuelson

Niels Thomsen

Ilanngussat:

Ilanngussaq 1: Partiit oqaaseqaataannut Nunamut namminermut, Pinnngortitamut Avatangiisinullu Naalakkersuisumit oqaasertaliussat pillugit ilisimatitsissut.

Ilanngussaq 2: Inatsisissatut siunnersuutip aningaasaqarnikkut allaffissornikkullu sunniutissai pillugit Nunamut namminermut, Pinnngortitamut Avatangiisinullu Naalakkersuisumit ilisimatitsissut.

Ilanngussaq 3: Allannguutissatut siunnersuut aappassaaneerinninnermut saqqummiunneqartoq.